

歸潛志

一卷之六卷

雨

柳田文庫

文庫11

D 2

2



歸
潛
志

文庫 11
D 2
2

010190547774

柳田泉文庫

歸潛志序

余生八年去鄉里從祖父游宦于大河之南時南京為
行宮因得從名士大夫問學不幸弱冠而先子歿其後
進于有司不得志將歸隱于太皞之墟一旦遭值金亡
干戈流落由魏過齊入燕凡二千里甲午歲復于鄉蓋
年三十二一作三矣因思向日二十餘年閒所見富貴權
勢之人一時烜赫如火烈烈者迨遭喪亂皆烟銷灰滅
無餘而吾雖貧賤一布衣猶得與妻子輩完歸是亦不
幸之幸也由是其所經涉憂患與夫被攻劫之苦奔

歸潛志序

一知不足齋叢書

歸潛志卷第一
走之勞雖飯蔬飲水橐中無寸金未嘗帶諸胸臆獨念
昔所與交游皆一代偉人今雖物故其言論談笑想之
猶在目且其所聞所見可以勸戒規鑒者不可使湮沒
無傳因暇日記憶隨得隨書題曰歸潛志歸潛者予所
居之堂之名也因名其書以誌歲月異時作史亦或有
取焉歲乙未季夏之望渾源劉祁京叔自敘

歸潛志卷第一

金海陵庶人讀書有文才爲藩王時嘗書人扇云大柄
若在手清風滿天下人知其大志正隆南征至維揚
望江左賦詩云屯兵百萬西湖上立馬吳山第一峯
其意氣亦不淺

宣孝太子世宗子章宗父也追謚顯宗好文學作詩善
畫人物馬尤工迄今人間多有存者

章宗天資聰悟詩詞多有可稱者宮中絕句云五雲金
碧拱朝霞樓閣崢嶸帝子家三十六宮簾盡捲東風

無處不楊花真帝王詩也命翰林待制朱瀾侍夜飲

詩云夜飲何所樂所樂無喧嘩靜無嘩三杯淡醺

醪一曲冷琵琶坐久香成穗夜深燈欲花夜深一陶

陶復陶陶醉鄉豈有涯聚骨扇詞云幾股湘江龍骨

瘦巧樣翻騰疊作湘波皺金縷小鈿花草鬪翠條更

結同心扣一作金殿日長承宴久招來暫喜清風透

忽聽傳宣須急奏輕輕褪入香羅袖又擘橙為軟金

盃詞云風流紫府郎痛飲烏紗岸柔軟九回腸冷怯

玻瓈盃一作纖纖白玉葱分破黃金彈借得洞庭春

飛上桃花面嘗為鐵券行數十韻筆力甚雄又有送

張建致仕歸弔王庭筠下世詩具載飛龍記中

豫王允中世宗第四子也好文善歌詩有樂善老人集

行於世

密國公壽按金史本名壽字仲寶按金史字仲世宗之

孫越王允常之子也幼有俊才能詩工書自號樗軒

居士宣宗南渡防忌同宗親王皆有門禁公以開府

儀同三司奉朝請家居止以講誦吟詠為樂時時潛

與士大夫唱酬然不敢彰露正大閒余入南京因訪

歸澤志卷一
僧仁上人會公至相見欣然其舉止談笑真一老儒
殊無驕貴之態後因造其第一室蕭然琴書滿案諸
子環侍無俗談可謂賢公子矣乃出其所藏書畫數
十軸皆世間罕見者後余適陳送以二詩甚佳又爲
予先子集作後序一時文士如雷希顏元裕之李長
源王飛伯皆遊其門飛伯嘗有詩云宣平坊裏榆林
巷便是臨淄公子家寂寞畫堂豪貴少時容詞客聽
琵琶蓋實錄也天興初北兵犯河南公已臥疾予候
之因論及時事公曰敵勢如此不能支止可以降全

吾祖宗且本邊塞如得完顏氏一族歸我國中使女

直不滅則善矣餘復何望爾後數月薨

按元好問所
作如菴詩文

序壽以天興壬辰五
月薨春秋六十一

五子幼曰守禧字慶之年少亦

有俊才作詩與字畫亦可喜狀貌白皙丰神秀徹如
仙人公特鍾愛嘗會予指其書畫曰將以付斯人公
薨崔立之變皇族皆聚於禁中將北遷慶之病死年
未三十公平生詩文甚多晚自刊其詩三百首樂府
一百首號如菴小藁趙閑閑序之行於世其佳句有
聞閑閑再起爲翰林云蓮燭光中久廢吟一朝超擢

睿恩深四朝耆舊大宗伯三紀聲名老翰林人道蛟

龍得雲雨我知麋鹿強冠襟寶巖崆谷西窗夢不信

秋來不上心又過胥相墓云亭亭華表立朱門立中州集

作映始信征南宰相尊征南中州集作征西下馬讀碑人不識夷

山高處望中原甚有唐人遠意又絕句孟津休道濁

于涇若遇承平也敢清河朔幾時桑柘底只談王道

不談兵不可謂無志者也

趙學士秉文字周臣磁州滏陽人少擢第按金史大定二十五年進

士作詩及字畫有名王庭筠子端薦入翰林因言事

忤旨外補後再入館為脩撰待制轉禮部郎中出典

岢嵐平定寧邊三郡南渡為直學士遷侍讀拜禮部

尚書致仕再起為禮部改翰林學士天興改元夏五

月卒按元本作夏四月卒考元遺山撰墓志云卒于五月十二日子家有閑閣手書詩一卷後遺山

跋語亦云五月十二年七十三按金史卒公幼年詩

日下世今據以改正與書皆法子端後更學太白東坡字兼古今諸家學

及晚年書大進詩專法唐人魁然一時文士領袖壽

考康寧爵位士大夫罕及焉性疎曠無機鑿治民鎮

靜不生事在朝循循無異言家居未嘗有聲色之娛

夫人卒不再娶斷葷日麤衣糲食不卹也酷好學至
老不衰後兩目頗昏猶孜孜執卷鈔錄上至六經解
外至浮屠莊老醫學丹訣無不究心其所著有太元
解老子解南華指要溢水集外集無慮數十萬言自
號閑閑居士云

李翰林純甫字之純宏州襄陰人祖安上嘗魁西京進
士父采仲文卒于益都府治中公幼穎悟異常兒初
爲詞賦學後讀左氏春秋大愛之遂更爲經義學踰
冠一作擢高第按金史永安二年經義進士名聲熒然爲文法莊

周左氏故其詞雄奇簡古後進宗之文風由此一變
又喜談兵慨然有經世志泰和南征兩上疏策其勝
負章宗咨異給送軍中後多如所料宰執奇其文薦
入翰林及北方兵起又上疏論事不報宣宗南渡再
入翰林時丞相术虎高琪擅權擢爲左司都事公審
其必敗以母老辭去俄而高琪誅死識者智之再入
翰林連知貢舉正大末由取人踰新格出倅坊州未
赴改京兆府判官卒于南京年四十七公爲人聰敏
於學無所不通少自負其才謂功名可俯拾作矮柏

賦以諸葛孔明王景略自期由小官上萬言書援宋
爲證甚切當路者以迂闊見抑士論惜之中年度其
道不行益縱酒自放無仕進意得官未嘗成考旋卽
歸隱居閒與禪僧士子遊惟以文酒爲事嘯歌袒裼
出禮法外或飲數月不醒人有酒見招不擇貴賤必
往往輒醉雖沈醉亦未嘗廢著書至于談笑怒罵燦
然皆成文理天資喜士後進有一善極口稱推一時
名士皆由公顯于世又與之拍肩爾汝忘年齒相歡
教育撫摩恩若親戚故士大夫歸附號爲當世龍門

嘗自作屏山居士傳末云雅喜推借後進如周嗣明
張穀李經王權雷淵余先子姓名宋九嘉皆以兄呼
而居士使酒玩世人忤其意輒嫚罵之皆其志趣也
其自贊曰軀幹短小而芥視九州形容寢陋而蟻虱
公侯語言蹇吃而連環可解筆札訛廢而挽回萬牛
寧爲時所棄不爲名所囚是何人也邪吾所學者淨
名莊周晚自類其文凡論性理及關佛老二家者號
內藁其餘應物文字如碑誌詩賦號外藁蓋擬莊子
內外篇又解楞嚴金剛經老子莊子又有中庸集解

鳴道集解號為中國心學西方文教數十萬言嘗曰
自莊周後惟王績元結鄭厚與吾此其所學也每酒
酣歷歷論天下事或談儒釋異同雖環而攻之莫能
屈世豈復有此俊傑人哉附錄重修面壁菴記。大
士李純甫撰屏山居士儒家子也始知讀書學賦
以嗣家門學大義以業科舉又學詩以道意學議論
以見志學古文以得虛名頗喜史學求經濟之術深
愛經學窮理性之說偶於元學似有所得遂於佛學
亦有所入學至於佛則無可學者乃知佛即聖人聖
人非佛西方有中國之書中國無西方之書也吾佛
大慈皆如實語發精微之義於明白處索元妙之理
於委曲中學士大夫猶畏其高而疑其深誣為怪誕
詬為邪淫惜哉龍宮海藏琅函貝葉無慮數千萬言
項之而不觀目之而不解且數百年老師宿德又各

執其所見裂於宗乘洞於義疏吾佛之意掃地矣悲
夫梁普通中有菩提達摩大士自西方來孤唱教外
別傳之旨豈吾佛教外復有所傳乎特不泥於名相
耳真傳教者非別傳也如有雅樂非本色則不成宮
商如有甲第非主人則不知戶庭自師之至其子孫
徧天下多魁閣磊落之士碩大光明表表可紀劇談
高論逕造佛心漸于義學沙門波及學士大夫潛符
密契不可勝數其著而成書者清涼得之以疏華嚴
圭峯得之以鈔圓覺無盡得之以解法華頌濱得之
以釋老子吉甫得之以注莊子李翱得之以述中庸
荆公父子得之以論周易伊川兄弟得之以訓詩書
東萊得之以議左氏無垢得之以說語論孟使聖人
之道不墮於寂滅不死於虛無不縛於形器相為表
裏如符券然雖狂夫愚婦可以立悟於便旋顧盼之
頃如分餘燈以燭冥室顧不快哉道冠儒履皆有大
解脫門翰墨文章亦為游戲三昧此師之力也新學
晚生愧無以報今因少林主人志隆命其侍者海淨
問訊屏山日照了居士王知非暨劉菩薩并其徒儲

道人重修面壁菴既已落成請記其歲月時大金興
定四年中元之前一日也隨喜之餘又洗手焚香而
為之贊曰元關未啟玉鎖生苔靈臺未洗金鏡塵埋
鐵牛穿鼻石女懷胎孰為具眼鼻祖西來舟行萬里
禪心如灰壁觀九年梵音如雷不戒而戒不齋而齋
一衣一鉢五葉花開或杖或拜或噴或舞警欬揚眉
顰呻舉武或咄或唳或叫或普柏樹藥欄燈籠露柱
彈指張弓吹毛擊鼓跌宕形容逕庭言語太漫汗中
別渾淪處有者箇在又恁麼去津然可口如甘露漿
薰然入骨如薝蔔香如發管鑰如施印章金仙海藏
同時放光竊吾糟粕貸吾糝糠粉澤孔孟刻畫老莊
入萬四千清涼道場屏山說破誰敢承當。按屏山
文字傳世絕少偶從碑本錄附以見一斑

雷翰林淵字希顏按中州集別字季默應州渾源人與余同里閉

且姻家也父思西仲名進士仕至同知北京轉運司

註易行于世公幼喪父以孤童入太學讀書晝夜不

休雖貧甚不以介意按金史希顏西仲季子庶出三歲喪父不為諸兄所齒七歲乃

發憤入太學讀書從李屏山遊遂知名俄中高第調涇州錄

事坐高庭玉獻臣之獄幾死後改東平遷東阿令授

徐州觀察判官興定末召為英王府文學英王中州集作荆王

按金史宣宗第二子守純本名盤都貞祐元年封濮王興定三年進封英王至哀宗正大元年始進封荆王則興定末當稱英王中州集稱荆王者誤也俄入翰林為應奉拜監察御

史言五事稱旨又彈劾不避貴臣出巡郡邑所至有

威譽凡姦豪不法者立箠殺之坐此為小人所訟罷

去按淵在蔡州杖殺五百人時號雷半千坐此為人所訟罷去久之起為太學博

士南京轉運司戶籍判官遷翰林修撰一夕暴卒年

四十八按遺山集希顏墓誌云年四十六公博學有雄氣為文章專

法韓昌黎尤長于敘事詩雜坡谷喜新奇好收古人

書畫碑刻藏于家甚富喜結交凡當途貴要與布衣

名士無不往來居京師賓客踵門未嘗去舍後進經

公品題以為榮家無餘貲及待賓客豐腆甚莅官喜

立名初登第攝令遂平一邑大震嘗笞州魁吏州檄

召不應罷去後凡居一職輒震耀亦坐此仕不達然

士論未嘗不壯之嘗為文祭高公獻臣其詞高古一

時傳誦工于尺牘辭簡而甚文朋友得之輒以為珍

藏發書頃刻數十軸皆得體可愛在館與諸同年友

制辭皆摘其不及以箴之如誥商衡平叔云將迎閒

有亦須風節之自持誥聶天驥元吉云讀書大可益

人宜勤講學少年賦松菴詩曰菴中偃臥龍閱世鬚

髯古人天共護持半夜起風雨過華山懷陳希夷云

五季乾坤半晦冥先生有意俟澄清勦勦四十年來

睡開眼東方日已明又梅影云維摩丈室冷于冰干

劫蕭然無盡燈天女散花愁不寐夜深高髻影崩鬢
人皆傳之初善李屏山後善馮公叔獻後善高公獻
臣最後善趙公周臣陳公正叔早與余先子交嘗同
鄉校同太學後同朝先子歿公寄挽詩有云鄉校連
裾春誦學上庠同榻夜論心余因請為墓誌迄今予
家有公書簡甚多也善飲啖未嘗見大醉酒閒論事
口吃而甚辯出奇無窮此真豪士也

宋翰林九嘉字飛卿夏津人少遊太學有詞賦聲從屏
山遊讀書為文有奇氣與雷希顏李天英相埒也至

寧初擢高第歷關中四邑以能稱

按金史四邑為藍田高陵扶風三水

召補省掾為當軸者所忌求去已而為延安帥府所
辟充經歷官召為南京右巡院使風采甚著以不能
事權要罷官俄入翰林為應奉得風疾引去遭亂北

還道病歿

按中州集云正大中病失音廢居歿于癸巳之禍

年未五十士大

夫惜之飛卿為人剛直英邁不羣能政能文甚為時
望所屬不幸中以病廢哀哉初召至南京時屏山亦
在予每從之遊亂後予居八仙館與飛卿相邇日相
見屬和其詩猶在予囊中少時題太白泛月圖云江

心月影盡一掬船頭杯酒盡一吸夜深風露點宮袍
 天地之間一李白可想見其意氣也文辭簡古法宋
 祁新唐書惜乎為吏事所奪不多著性不喜佛雖從
 屏山遊常與爭辯在關中時因楊煥然赴舉書與屏
 山薦之曰煥然佳士往見吾兄慎無以佛老乃嫚之
 也二句似有脫誤屏山持之示交遊以為笑其後西行予以
 序送之備論其守道不回今茲云亡豈復見此挺特
 之士乎按中州集云飛卿不喜佛法自言平生有三恨一恨佛老之說不出于孔氏前二恨辭學之士多好譯經潤文三恨大才而攻異端其題蓮社圖詩云惟有淵明挽不來蓋自況耳

歸潛志卷第一

歸潛志卷第二

李經天英錦州人少有異才入太學肄業屏山見其詩
曰真今世太白也盛稱諸公閒由是名大震字畫亦
絕人再舉不第拂衣歸南渡後其鄉帥有表至朝廷
士大夫識之曰此天英筆也朝議以武功就命倅其
州後不知所終天英爲詩刻苦喜出奇語不蹈襲前
人妙處人莫能及號無塵道人題太真圖云君前欲
拜還未拜花枝無力東風羞又夜雨云燈火萬家夜
蕭蕭簾下聲晚望云夕陽萬里眼人立秋黃中夜起

云夜半不得月河漢空星辰又步雲意云一片崑崙
心夕陽小煙樹又四言云老峯蹙雲壁立挽秀林陰
灑雨蒼蒼玉鬪虛明滿鏡夜氣成晝此其詩體也

張穀伯玉許州人伯英運使弟也少有俊才美丰姿髯
齊于腹爲人豪邁不羈奇士也初入太學有聲從屏
山遊與雷李諸君及余先子善雅尙氣任俠不肯下
人再舉不中遂輟科舉計居許之郟城有園囿田宅
甚豐日役使諸姪治生事而已則以詩酒自放偃然
爲西州豪俠魁邑令過使皆下之喜稱人善交遊有

患難極力挈扶俗子少不愜意輒嫚罵年四十餘不
娶有一妾因小過以鐵簡殺之嘗衣紫綺裘半醉坐
堂上人望之如神迨酒酣興發引紙落筆往往有天
仙語後病腦疽死年未五十麻九疇知幾爲文以祭
辯其爲人大略少時與屏山飲燕市有詩云日日飲
燕市人人識張鬚西山晚來好飲酒不下驢又云昨
日上高樓西山翡翠堆今日上高樓西山如死灰想
見屏山老療飢西山隈餐盡西山色高樓空崔嵬又
賦古鏡云軒姿古鏡黑如漆錦華鱗皴秋雨溼人以

爲不減李長吉云

周嗣明晦之真定人叔昂德卿名士文章氣勢一時流
輩推之屏山最愛之嘗曰若德卿操履端重學問淳
深真韓歐輩人也晦之爲人有學長于議論自號放
翁屏山嘗與作真贊與雷宋張李輩頡頏同余先子
擢第後從其叔北征在軍中軍敗父子俱縊死屏山
贅談晦之序也屏山送李天英詩云髯張元是人中
龍喜如俊鶻盤秋空怒如怪獸拔枯松按二如字別本俱作時
更著短周時緩頰智囊無底眼如月斫頭不屈面如

鐵一說未終復一說勅敵相阨已錚錚二豪同運又
連衡屏山直欲樹降旌那得人閒有阿英阿英魁奇
天下士筆頭風雨三千字醉倒謫仙元不死時借奇
兵攻二子可想見三人者也

王權士衡真定人又名之奇從屏山遊屏山稱之爲人
跌宕不羈喜功名博學無所不覽酣飲放歌人以爲
狂屏山爲作狂真贊與余先子同年進士然仕宦連
蹇晚召入朝爲部勾當官俄辟爲縣令未赴家魯山
爲縣吏所辱憤發疾死貞祐初余先子攝許州幕

時屏山二張伯英伯玉雷魏諸公皆在焉日會飲為樂忽高公獻臣將赴河南來過諸公詣之及夕獨希顏士衡留宿高既去未幾為主帥所誣陷以有異志逮捕諸黨與符下潁川械二公赴洛獄擄掠萬端會赦方得免然自茲士衡無仕進之意矣

麻九疇知幾初名文純易州人

按中州集云莫州人

幼穎悟善草

書

按金史三歲識字七歲能草書作大字有及數尺者

能詩號神童既長入太

學刻苦自勵為趙閑閑李屏山所知南渡後居郟蔡閒入遂平西山讀書為經義學精甚興定末試開封

府詞賦乙經義魁再試南省復然聲譽大振南都婦

人小兒皆知名及廷試以誤紕士論惜之已而隱居

不為科舉計正大初門人王說王采苓俱中第上以

其年幼怪而問之具知幾為師近臣言其有才學

平章政事侯公摯翰林學士趙公秉文俱薦之特召

賜進士第

盧亞榜

以病不拜官告歸病已赴調授太常

寺太祝俄入翰林復以病去居郟久之北兵入河南

天興元年

知幾挈其孥入確山避亂後復出為兵士所得

驅之北邊至廣平病死

按金史年五十九

知幾為人耿介清

苦雖居貧不妄干求卓然以道自守然性隘狹交遊
少不愜意輒怒去蓋處士之剛者也初因經義學易
後喜邵堯夫皇極書因學算數又喜卜筮射覆之術
晚更喜醫方與名醫張子和遊盡傳其學爲文精密
巧健詩尤奇峭妙處似唐人嘗作透光鏡篆韻詩按
詩載中州集人爭傳寫後以避謗畏時忌持戒不作詩益
潛心爲易學與張伯玉宋飛卿雷希顏李欽叔及余
先子善先子初攝令鄆城日與唱酬爲友後知幾試
開封先子爲御史監試而王翰林從之李翰林之純

爲有司因相與讀舉子之文見其有雄麗者相謂曰
是必知幾因擢爲魁已而果然士林以得人相賀晚
景爲趙閑閑所知有送麻徵君序并詩云

辛愿敬之河南人

按金史福昌人

自號女几野人又號溪南詩

老幼嗜書苦學坐環堵數年由是六經百家無不通
貫喜作詩五言尤工人以爲得少陵句法平生不爲
科舉計且未嘗至京師若然中州一逸士也爲人質
古不嫺世事麻條草屨或倚杖讀書市中人訝之亦
不卹嘗謂王鬱飛伯曰王侯將相世所共嗜者聖人

有以得之亦不避得之不以道與夫居之不能行己
之志是欲澡其身而伏于廁也此言他人難聞子宜
保之此可見其志趣也貞祐初先子主長葛簿敬之
素不識聞其名來謁相得甚懽及別厚贈之歸而買
牛使其子躬耕以自給居女几山下往來長水永寧
閒惟以吟詠講誦爲事朝士大夫願交而不得也正
大中先子令葉復來遊後歸洛下病歿有詩數千首
常在行囊中其佳句有云院靜寬留月窗虛細度雲
又鶯銜晚色啼深樹燕掠春陰入短牆又波搖朗月

浮金鏡嶺隔華星斷玉繩又箕山潁水春風裏喚起
巢由共一杯又黃綺暫來爲漢友巢由終不是唐臣
真處士詩也

趙宜祿宜之忻州人幼舉童子第及壯病目失明自號
愚軒居士高才能詩其所讀書皆自少時不忘居西
山下止以吟詠爲樂名士無不與遊趙李諸公甚重
之屏山嘗賦愚軒云我雖有眼不如無安得恰似愚
軒愚後病歿有愚軒集其題嵩陽歸隱圖云嵩陽一
作嵩山
風煙萬頃一椽茅一椽一
作十椽邱壑端能傲市朝窈窕雲

山三兔穴飄飄風樹一鳩巢本來無取亦無與只合
自漁還自樵三十六峯俱可隱願從君後不須招送
辛敬之云李白久矣騎長鯨後五百歲之純生

史學學優河南人

按中州集延安人

昆弟三人兄才長亦知名

學優之學長于史傳地理工詩絕句殊妙年五十擢
南省魁後中廷策得主武陽簿頗有政聲再辟盧氏
令病卒興定末與余同試于廷始識之中夜棘闥談
至旦後先子令葉學優復來游先子歿學優寄挽詩
未幾亦下世有詩數百首其七夕云箱牛回馭錦機

閒天上悲歡亦夢閒月夜凭肩人不見蕭蕭風葉滿

驪山又絕句石壁城頭夜斬關軟紅塵底曉催班道

人一笑那知此門外清溪屋上山又哭屏山云張侯

新作九原人

伯玉

梁子今為戰血塵

仲涇父

四海交游零

落盡白頭扶杖哭之純

李獻能欽叔河中人先世以武功顯仕至金吾衛上將
軍時號李金吾家迨欽叔昆弟皆以文學有名從兄
欽止獻卿先擢第繼以欽叔又繼以仲兄欽若獻誠
從弟欽用獻甫故李氏有四桂堂欽叔苦學博覽無

不通尤長于四六南渡擢南省魁復中宏詞按金史貞祐三

年特賜詞賦進士廷試第一人宏詞優等遂入翰林為應奉考滿再畱出

為鄜州觀察判官再入遷脩撰正大末授河中帥府

經歷官北兵來攻軍敗奔陝又為陝府經歷官天興

改元陝亂見殺年四十三欽叔為人眇小而黑色頗

有髯善談論每敷說今古聲鏗亮可聽作詩有志于

風雅又刻意樂章在翰院應機敏捷號得體趙閑閑

李屏山嘗曰李欽叔天生今世翰苑材故諸公薦之

不令出館嘗謂人云吾幼夢官至五品壽不至五十

後竟如其言異哉按金史家故饒財盡于貞祐之亂在京師無以自資其母素豪奢厚

于自奉小不如意則必詞譴人視之殆不堪憂獻能處之自若也人以純孝稱之

冀禹錫京父惠州龍山人幼聰敏絕倫年十九擢大興

魁入太學有聲弱冠登高第時雷希顏宋飛卿皆同

榜號為得人京父入仕以能稱遇事風生老吏莫及

初主沈邱簿以年少喜交游飲酒遂為其令所乘坐

廢再調考柘二城皆主簿又以治聞由前過終不得

京官朝士屢薦之為當途者所沮居閒日與諸公宴

游蒙昭雪得扶風丞因客睢陽為行樞密院辟為都

事末帝東遷擢為應奉翰林文字充尚書省都事蒲察官奴之變與宰相李蹊同見殺

按中州集云官奴之變自投水中

年四十三京父少年作詩鍛鍊甚工寫畫亦勁健可喜其贈先子詩有云忠策萬言憂國獻好詩千首課兒鈔又哭先子云大才自古無高位吾道何人主後盟又醉鄉廣大寬畱地仕路崎嶇小作程聞誅高琪詔下寄聶元吉云開函喜讀故人書四海窮愁一豁無見說帝庭新殛鯨逆知天意欲亡吳兩宮日月開明詔萬國衣冠入坦途莫向新亭共囚泣中興豈止

一夷吾散文亦精緻嘗作余先子哀詞雷丈希顏善之

王渥仲澤後名仲澤太原人家世貴顯少游太學有詞賦聲屢中高選南渡後擢第為時帥奧屯邦獻完顏斜烈所知故多在兵閒後辟令寧陵有治迹召為省掾因使宋至揚州應對華敏宋人重之回為太學助教充樞密院經歷官俄遷右司都事稍見信用天興改元從赤蓋合喜提兵出援武仙鄭州西遇北兵大戰歿于陣性明俊不羈博學無所不通長于談論使

人聽之忘倦工尺牘字畫適美有晉人風作詩多有佳句其過潁亭云九山西絡煙霞去一水南吞澗壑流賓主唱酬空翠琰干戈橫絕自滄洲又贈李道人云簿領沈迷嫌我俗雲山放浪覺君賢又潁州西湖云破除北客三年恨慚愧西湖五月春又過龍門云詩成一大笑浩浩洪波東

李汾長源先名讓字敬之太原人

按金史太原平晉人

少游秦中

喜讀史書覽古今成敗治亂慨然有功名心工于詩專學唐人其妙處不減太白崔顥為人尚氣跌宕不

羈頗褊躁觸之輒怒以是多為人所惡嘗以書謁行臺胥相國鼎胥未之禮也長源後投以書盡發胥過惡胥大怒然以其士人容之元光閒游梁舉進士不能詩聲一日動京師諸公辟為史院書寫時趙閑閑為翰林雷希顏李欽叔皆在院長源不少下之諸公怒將逐去亦不屑後以病目免歸復入南京上書言時事不報出客唐鄧會北兵入境恒山公武仙署為掌書記在軍中金國亡長源勸仙歸宋未幾為仙麾下所殺年未四十哀哉

按金史仙與參知政事完顏思烈相異同頗謀自安

十知不足齋叢書

皇清志卷二
懼汾言論欲除之汾覺遁泌陽仙令總
帥王德追獲之鎖養馬平絕食而死 平生詩甚多
不自收集故往往散落其再過長安有云三輔樓臺
失歸燕上林花木怨啼鶻空餘一掬傷時淚暗墮昭
陵石馬前又下第絕句云學劍攻書事兩違回頭三
十四年非東風萬里衡門下依舊中原一布衣又記
時事云捕得酒泉生口說衆酋務面哭單于望少室
云圭影靜涵秋氣老劍鋒橫倚斗杓寒夏夜云鴉銜
暝色投林急螢曳餘光入草深鸛雀樓云白鳥去邊
紅樹小斷雲橫處碧山多樂府歌行尤雄峭可喜

李夷子遷後名伋字季武陳郡人出于兵家能刻苦爲
學喜讀史書究古今成敗治亂尤喜武事習兵法擊
劍馳射有志于功名累舉詞賦不中改試經義復不
售後將棄二科以武舉進身無何陳陷死年四十二
子遷爲人介特自守不羣然尙氣使酒剛甚平居循
謹惟恐傷人旣醉雖王公大人嫚罵不恤爲文尙奇
澀喜唐人作詩尤勁壯多奇語然不爲鄉里所知貞
祐末先子爲陳幕一見喜之爲延譽諸公閒後爲麻
知幾雷希顏所重東方後進皆推以爲魁若侯季書

雷伯威王飛伯杜仲梁曹通甫輩皆以兄事與余最深
 子遷既死余嘗為哀詞道其為人之詳平生詩不甚
 多不如意輒毀去嘗賦古鏡諸公稱之其詩曰盤盤
 古皇州夢斷繁華缺一鞭春事忙耕出壠頭月土蝕
 背花暗蹄涔駭龍蹲鬚髯始欲張不敢著手捫按中州集
云盤盤古皇州夢斷繁華歇一鞭春事忙耕出壠頭
月土蝕背花昏蹄涔駭龍蹲鬚髯怒欲張縮手不敢
 捫星環紫極位劍外十三字細看清用文其篆文云
 溟漠君墓誌壽堂鎖菱花引得阿紫家榛裡夕霏時
 幾照拂雙鴉神物污難久一日落吾手壽光閱人多

嘗有此客不呵呵吾戲云雅志踵先民鏡裏春風面
 泉下今日塵九原不可作哲弟師有若摩挲一面銅
 便有親炙樂又弔張伯玉云匣內青蛇亦悲吼竟憑
 誰識抉雲材又贈赤腿王云石鼎夜聯詩句健布囊
 春醉酒錢麤

歸潛志卷第二

春酒酌麴

籍籍林雲林又韻赤賦王云石鼎齋經指回對亦囊
與有賦矣樂又甲熟自王云國內青披亦悲即竟感
泉不今日聖人真不同卦晉策補音苦翠等一而陸
嘗言此容不四四音趨云報志載去吳論其春風面

歸潛志卷第三

侯策季書先字君澤中山人少不喜學鬪雞走狗雄鄉
里南渡後慨然有為學心與一時名士游盡絕少年
事喜作詩刻苦向學自漢魏六朝唐宋人諸集無不
研究初為李子遷所知薦于余先子亦喜之王飛伯
負其材素少許可一見季書詩即加敬為人任俠尚
氣然修謹無過失與余交最深久之居南頓一云久居陳之
頓南家甚貧遇朋友傾所有共樂天興改元陳亂失妻
獨走大梁詣余會疾作數月死諸朋友為買棺葬西

城余爲誌其墓刻石平生詩甚多同王飛伯唱和南
頓同余唱和梁園又喜效西崑體甚有得其弔一貴
人云歌翻薤露芻靈遠門掩秋風甲第深又云峯前
雨送閨中夢樓上雲凝扇底歌又明月花樓閒玉鳳
秋風桂漏戛銅龍又九疑湘瑟悲龍竹子夜秦簫隔
鳳樓又幽鳥弄音花覆地斷虹沈影水明河又詠雨
云勢侵書帙湘芸潤聲入簾旌蠟炬清又和飛伯云
世事催人南去早夢魂失路北歸遲置之唐人集中
誰復疑其非也

雷瑄伯威坊州人父秀實亦名進士伯威博學能文作
詩典雅多有佳句時輩稱之初余過陽夏聞其名及
一見傾倒歡甚後伯威赴葬余先子淮陽爲誄文雅
澹可喜余以示雷翰林奇之已而以家貧母老爲國
史院書寫秩滿爲八作使亂後南奔道爲兵士所殺
年未四十哀哉伯威爲人議論刻深然于文字甚工
細每酒酣談說今古莫能窮又欲取奇異功名自喜
亦不羈之士也其詩多散落有游龍德宮云千年金
谷銅駝怨萬里蜀天杜宇啼

啼又明月清風一壺酒與君同酌信陵墳

王鬱飛伯奇士也少余一歲與余交最深儀狀魁奇目光如鶻步武翩然相者云病鶴狀貌也少居釣臺閉門讀書不接人事數載爲文閎肆奇古動輒數千百言法柳柳州歌詩飄逸有太白氣象初爲御史程公震所知繼爲李翰林欽叔麻徵君知幾史盧氏學優嘉賞且共爲延譽籍籍正大初余先子令葉飛伯持諸公書來投先子異其文置門下遂與余定交每觴酒讌遊無不在已而入南京見趙雷諸公皆稱之不

已布衣少年名動京師後因下第西遊洛中余居淮陽凡三過留輒數月唱酬談論相高每相別輒以所著相寄且相商訂爲益正大末南京被圍復相守圍城中天興改元秋飛伯忽過余別曰吾跼伏陷窞不自得今將突圍遠舉然生死未可知因出其所作王子小傳屬余曰茲不朽之託也余不能止之而去三年不知存亡丙申歲南遊遇交游輩說飛伯初爲東諸侯兵士所得其將厚遇之飛伯徑行不設機久之爲其下所忌見殺臨終懷中出書曰是吾平生著述

可傳付中州士大夫王飛伯死矣計其時年甫三十子哭諸鎮陽蓋飛伯爲人雖聰穎絕人然涉世日淺頗驚岸不通徹此所以不免余嘗見其舉止言談無顧忌苟爲懽然而飛伯益自信莫能戒以是常得謗議爲俗人所憎迄今談其名不悅者多矣嗟乎以斯人之才氣稍有鍛鍊其文章所至豈易量哉今而中道摧折不迄于大成可以爲斯文歎其詩文往來與余最多有淮陽唱和南頓聯句古賦銘贊書序數十首遭亂皆在余橐中今仍略載其小傳云先生名青

雄一名鬱大興府人也十五代祖珪相唐太宗官侍中永寧郡公會祖衍金紫光祿大夫定海軍節度使兼萊州管內觀察使祖彥信邠州宜祿尉父欽山東路轉運司鹽鐵判官先生始生之月父夢神人自天而下開所負紫絲囊賜一大鵬且云吾後必來取其鵬在地振羽一鳴驚而寤訪諸日者繇曰凜凜霜鶚賜自上穹旣文于外又剛于中法生貴子其應在公他日必作青雲之雄先生旣生因採其語爲名字年十八父歿家素富貲累千金遭亂蕩散無幾先生殊

不以為意發憤讀書是時學者惟事科舉時文先生
為文一掃積弊專法古人最早為麻徵君九疇所賞
其後潛心述作未嘗輕求人知李欽叔過釣臺得其
所著傷魯麟導懷等賦并楊孝童碑王夢祥哀辭大
驚膽書徧薦于諸公先生之名始滿天下自此去釣
臺放游四方又移隱陘山覃思古學正大五年先生
年二十五矣來游京師諸公倒屣爭識其面宰相聞
其名取所作文章將薦之事中格樛軒皇叔密閑閑
朝廷二大老皆致禮于先生交館之明年以兩科舉

進士不中西遊洛陽放懷詩酒盡山水之歡先生平
日好議論尚氣自以為儒中俠所向敢為不以毀譽
易心又自能斷大事其論學孔氏能兼佛老佛老為
世害然有從事于孔氏之心學者徒能言而不能行
縱欲行之又皆執于一隅不能周徧故嘗欲著書推
明孔氏之心學又別言之行之二者之不同以去學
者之弊其論經學以為宋儒見解最高雖皆笑東漢
之傳注今人唯知蹈襲前人不敢誰何使天然之智
識不具而經世實用不宏視東漢傳注尤為甚亦欲

著書專與宋儒商訂其論為文以為近代文章為習俗所蠹不能遽洗其陋非有絕世之人奮然以古作者自任不能唱起斯文故嘗欲為文取韓柳之辭程張之理合而為一方盡天下之妙其論詩以為世人皆知作詩而未嘗有知學詩者故其詩皆不足觀詩學當自三百篇始其次離騷漢魏六朝唐人過此皆置之不論蓋以尖慢浮雜無復古體故先生之詩必求盡古人之所長削去後人之所短其論詩之詳皆成書其論出處以為仕宦本求得志行其所知以濟

斯民其或進而不能行不若居高養蒙行樂自適不

為世網所羈頗以李白為則先生受知最深者曰樗

軒公完顏壽閑閑公趙秉文余先子雷淵李獻能王

若虛麻九疇史學優程震宋九嘉其游從最久者曰

李汾楊宏道元好問魏蟠一作璠張邦直杜仁傑曹居

一雷瑄冀禹錫張介王說王采荅趙著張甫王鑄劉

輯李全劉源楊奐胡權徒單公履呂鯤史環李佖侯

策張傑劉郁左坦一作垣牛汝霖木虎邃烏林荅爽僧

性英諸公隨得書無次第按困學齋雜錄楊宏道字叔能號素菴默翁淄川人

張邦直平陽人曹居一字通甫號聽翁又號南湖散人張介字介夫彭城人趙著燕人人稱虎巖先生楊

奉天人至于心交者惟李治劉祁二人而已八年

先生復至京師十二月遇兵難京城被圍先生上書

言事不報明年四月圍稍解五月先生挺身獨出遠

隱名山不知所終

劉昂霄景賢按中州集字景元陵川人博學能文從屏山游又

與雷希顏辛敬之元裕之善嘗由任子入官已而隱

居洛西山水閒踰四十病卒其詩有云歲月銷磨詩

硯裏按中州集云今古消磨詩句裏河山浮動酒盃中迢迢萬里乾

坤眼凜凜千年草木風元裕之嘗稱之余恨未之識

也

木虎邃士元先名玆字溫伯女直納鄰猛安也雖貴家

刻苦為詩如寒士喜與士大夫游初受學于辛敬之

習左氏春秋後與侯季書交築室商水大野中惡衣

糲食以吟咏為事詩益工時余在淮陽屢相從講學

迨北兵入河南被命提兵戍亳州已而毫亂見殺年

未四十也少年詩云山連嵩少雲煙晚地接嶠函艸

樹秋其寄余云西湖風景昔同遊醉上蘭舟泛碧流

楊柳風生潮水闊芙蓉煙盡野塘幽

一作秋

花邊落日

明金勒雲裏清歌繞畫樓今夜相思滿城月梁臺楚
水兩悠悠又睢陽道中云又渡澗江二月時淮陽東
下思依依邱園寂寞生春草城闕荒涼對落暉去國
十年初避亂投荒萬里正思歸臨岐卻羨春來雁亂
逐東風向北飛又書懷云關中客子去遲遲

關中一作關東

飄泊炎荒兩鬢絲三楚樓臺淹此日五陵鞍馬想當
時春風草長淮陽路落日雲埋漢帝祠回首故鄉何
處是北山天際綠參差甚有唐人風致

烏林荅爽字肅孺女直世襲謀克也風神蕭灑美少年
性聰穎作奇語喜從名士游居淮陽日詣余家夜歸
其室鈔寫諷誦終夕雖世族家甚貧為後母所制踰
冠未娶惡衣糲食恬如遇交游杯酒豪縱可喜余謂
使其志不輟年稍長則當魁其輩流壬辰陳陷赴水
死年未三十初賦鄴研詩有云上有丹錫花秋河碎
星斗磨研清且厲玉瑟鳴風牖又賦古尺云背逐一
道十三虹赤鬣金鱗何天矯翻思昨夜雷霆怒只恐
乘雲上天去又七夕曲云天上別離淚更多滿空飛

下清秋雨其才清麗俊拔似李賀惜乎不見其大成也

劉琢伯成中山人刻苦為學事母教弟以孝友聞朋友居鄧州人甚重之正大初舉進士南京余始與相識俄下第歸久之河南亂聞在武仙軍中一云軍中人中仙使使宋回為所殺哀哉作詩甚工有云吳蠶絲就方成繭楚柳綿飛又作萍非淺淺者所能道也其過葉哭余先子詩亦佳

史懷季山陳郡人少游宕不羈然有才思年既壯乃折

節為學與名士李子遷侯季書王飛伯游作詩甚有

力一作功冬日即事云簷雪日高晴滴雨鑪煙風定暖

生雲亦可喜也又作古劍詩極工古劍一作古鏡陳陷死

劉昉仲宣中山人讀書有才學作詩甚有可稱嘗作淮陽八詠工甚居西華之小姚鎮時來游陳余識之遭

亂歿

高永信卿漁陽人倜儻尚氣輕財好交游頗讀書喜談兵文辭豪放長于論事嘗從屏山游與李長源元裕之杜仲梁李稚川相善累舉不第家甚貧正大末余

居淮陽信卿持諸公書來謁因爲定交畱月餘西去
未幾同在南京被圍嘗上書言事不報以病死自號
應菴

胡權直卿衛州人南渡有詩聲累舉不第貧甚性狂狹
不能容尋常人年過四十方娶嘗投余先子淮陽又
與余同試于京遭亂北歸以病卒

田永錫義州人叔思敬耀卿名進士永錫少有詩聲其
過東坡墳詩云富貴一場春夜夢文章萬斛冷雲泉
英魂返卻眉山秀依舊春風草木天爲人傳誦興定

末同余試南京擢第遭亂南奔在江淮閒病卒

李澥公渡相州人王黃華門生也自號六峯居士工詩
及字畫皆得法於黃華與趙閑諸公游連蹇科場竟
不第至六十餘病終時人言公渡賦不如詩詩不如
字字不如畫科舉賦最緊何公渡最緊下也興定末
與余同試開封中選公渡甚喜有詩示一作呈余先子
後云姓名偶脫孫山外文字幸爲坡老知誰念三生
李方叔欲將殘喘寄鑪錘先子和荅云瓶有儲糧鬢
有絲蹉跎歲晚坐書癡輞川畫隱王摩詰錦里詩窮

杜拾遺應舉尙陪新進士主文多是舊相知春闈看
決魚龍陣未必尖錐勝鈍鎚士林相傳以為笑談

劉勳少宣雲中人初名訥字辯老與其兄漢老俱工詩

幼隨官居濟南二十餘載一云三十餘載後南渡居陳數與

余先子唱酬為人俊爽滑稽每尊俎閒一談一笑可

喜科舉連蹇竟不第年五十餘陳陷死平生詩甚多

大概尖新長於對屬其佳句有云午風襟袖知秋早

甲夜闌干得月多又濟南泛舟云人行著色屏風裏

舟在迴文錦字中又上先人云南山有後傳能賦北

闕無人繼敢言送余赴試云文章四海名父子孝友

一門佳弟兄又贈王清卿云長拖酒債杜工部新有

詩聲侯校書贈馬元章云曾著麻鞋見天子敢將道

服襯朝衣又車轂春雷震屋山馬蹄亂電響柴關何

時得個茅菴子不在車塵馬足閒又畫馬末云神物

世閒尋不見五陵春草色萋萋仲兒譙字庭老亦好

古作詩不凡中州集父祖而上為雲中人少宣
客居濟南樂其風土遂占籍焉

甯知微明甫宿州人博學無所不知尤長于史事劇談

古今治亂或諸家文章歷歷不可窮援筆為詩文亦

敏贍可喜舉經義連不中遷居淮陽與余遊二載家
積書萬卷載以行麻知幾及余先子皆重之後還鄉
遭亂不知所在或云渡淮在南中余嘗有西游詩四
十餘篇明甫取而觀一夕盡和其韻以見示其閒佳
句甚多

崔遵懷祖燕人父建昌萬卿名進士

中州集云字曼卿
大定二十五年進

士仕至同知武
安軍節度使

懷祖少有詞賦聲所交皆名士累舉

不第南渡輟科舉不為居嵩山下以讀書作詩為事
正大末北兵入河南懷祖為兵所得脅令往招洛陽

見殺嘗有詩云青山似有十年舊小雪又為三日雷
元裕之稱之

曹恆君章應州人高丞相汝礪之壻也少讀書不喜為
科舉計性孤介不冝事富貴人南渡居大梁葺軒種
竹號友直余先子為作賦記之又好收古人書畫器
物藹然有士君子風遭亂病歿有子之謙擢第

王賓德卿亳州人擢第

中州集云貞
祐二年進士

為虹令有聲入為

省掾坐事罷遭亂還鄉會兵變賓起率眾據城後屬
金亡已而見殺

按事詳
中州集

為人談諧輕脫嗜酒

一作無
恃酒

歸潛志卷第三
威儀詩頗工有上先子云致君有道莫如律敢諫不行猶得名

歸潛志卷第三

歸潛志卷第四

王元朗字子元宏州人余高祖南山翁壻也家世貴顯才高以詩酒自豪擢第得官輒歸不樂仕宦與余從曾祖西巖子多唱酬其明妃詩云環珮魂歸青塚月琵琶聲斷黑河秋漢家多少征邊將泉下相逢也自羞甚爲人所傳

劉仲尹致君號龍山遼陽人李欽叔外祖也少擢第終管義軍節度副使能詩學江西諸公其墨梅詩云高髻長眉滿漢宮君王圖上按春風龍沙萬里王家女

不著黃金買畫工爲人所傳又有梅影詩云五換巖
更三唱雞小樓天淡月平西風簾不著闌干角瞥見
傷春背面啼

陳君可永寧人有梅影詩云隔窗疑是李夫人江月多
情爲返魂不似丹青舊顏色十分憔悴立黃昏

王特起正之代州崞縣人少工詞賦有聲年四十餘方
擢第作詩極高嘗有龍德聯句爲時所稱又題楊叔
玉所藏雙峯競秀圖云龍頭矗雙角駝背堆寒峯諸
公嘉其破的晚年取一側室畱別一樂章喜遷鶯至

今人傳之東樓歡宴記遺簪綺席題詩羅扇月枕雙
欵雲窗同夢相伴小花深院舊歡頓成陳迹翻作一
番新怨素秋晚聽陽關三疊一樽相餞畱戀情繾綣
紅淚洗妝雨溼梨花面鴈底關河馬頭星月西去一
程程遠但願此心如舊天也不違人願再相見老生
涯分付藥爐經卷餘詩惜不多見嘗爲沁源令政頗
嚴後爲司竹監官疾卒

劉昂次霄濟南人有才譽以先有劉昂之昂故號小劉
昂泰和南征作樂章一闕上平西爲時所傳其詞云

薑鎡極蟾背展

背疑

敢盟寒似洞庭彭蠡狂瀾

似一作視

天兵小試萬蹄一飲楚江乾捷書飛上九重天春滿

長安舜文明唐日月周禮樂漢衣冠洗五川煙瘴江

山全蜀下也劍關何用一泥丸有人傳信日邊來都

護先還終鄒平令

金國初有張六太尉者鎮西邊有一士人鄧干江者

中州

樂府云臨洮人獻一樂章望海潮雲雷天塹金湯地險名藩

自古臯蘭繡錯雲屯山形米聚喉襟百二河關鏖戰

血猶殷見陣雲冷落時有鷗盤靜塞樓頭曉月猶自

玉弓彎看看定遠西還有元戎闔令上將齋壇區脫

晝空兜鈴夕舉

一作解

甘泉夜報平安吹笛虎牙閑但

宴陪珠履歌按雲鬟未討先零醉魂

一作招取英靈毅魄

長繞

賀蘭山

按中州樂府題云上蘭州守詞內繡錯雲屯作營屯繡錯百二河關作百二秦關猶自玉

弓彎作依舊玉弓彎甘泉夜報平安作甘泉又報平安但宴陪珠履作且宴陪珠履未討先零作未拓興

靈太尉贈以白金百星其人猶不愜意而去詞至今

傳之

高左司庭玉字獻臣遼東人少擢第

中州集恩州人

官有能聲吏事明敏人莫能及尤倣重氣節敢為

爲左司郎中譽甚重一時人士推仰焉貞祐初出爲河南府治中主帥溫迪罕福興姦僞人也公臨事少不遜讓遂交惡是時北兵圍燕都事已迫四方無勤王師公獨慨然有赴援意屢以言激福興福興憚之因誣以有異志輒收赴獄名士如龐才卿雷希顏辛敬之皆連繫王士衡亦被其禍見中州集考掠無實然公竟爲福興所困死獄中餘會赦得釋公旣卒朝命下除公河南路安撫副使代福興士夫痛憤後朝廷知其冤謫福興遠郡昭雪之屏山于人材少許可至論公獨以

爲真濟世材又言其學術端正可以爲吾道砥柱時之不幸爲姦人所害屏山以詩哭之甚哀雷希顏又爲文以祭述其事爲時所稱屏山又將文其碑未著死後其子屬之雷公雷公以其仇人猶在也亦未著死迄今事狀不詳惜哉公詩亦高余家有數十篇遭亂失去嘗記其中秋詩有云跳上玉龍背抱得銀蟾光按全詩載中州集題云天津橋同李之純待月亦奇語也

楊尙書雲翼字之美平定人先擢詞賦第又經義魁

按中

州集云樂平人明昌五年入仕能官練達吏事通材經義進士詞賦亦中乙科

也南渡為翰林學士吏禮部尙書御史中丞將大拜以風疾止再為學士卒士論惜之公篤學于九流無不通又善天文算學博洽人莫及嘗上疏諫宣宗南征鞫獄以寬恕待士謙甚士無賢不肖稱焉晚年與趙閑閑齊名為一時人物領袖且屢知貢舉多得人南渡時詔皆公筆其應制白兔詩云光搖玉斗三千丈氣傲金風五百霜又弔余先子有云清華方翰府憔悴忽佳城其餘文字甚多家有集子恕按中州集云子恕字誠之第進士

龐戶部鑄字才卿遼東人

中州集云大興人明昌五年進士自號默翁

少擢

第仕有能名南渡為翰林待制遷戶部侍郎坐游貴戚家出倅東平擢京兆路轉運使卒博學能文工詩書藹然為一時名士其題楊祕監雪谷曉裝圖云溪

流咽咽山昏昏前山後山同一雲天公談元玉屑噴

談元中州集作談笑散為花雨白紛紛花雨中州集作花葉詩翁瘦馬之

何許忍凍吟詩太清古元本作苦今從中州集作古老奴寒縮私

自語作奴莫作詩奴苦莫作中州集作莫比木僵石槁鳥不飛

石槁中州集作石老山路益深詩益奇老奴忍哭憐翁癡不知

詩好將何為中州集云老翁忍笑憐翁癡不知嗜好乃爾為楊侯胸中富邱

壑醉裏筆端驅雪落如何不把此詩翁如何中州畫集作因何畫

向草堂深處著

張運使毅字伯英許州人少擢第金史許州臨潁人大定二十八年進士

以謹愿純厚著名嘗為監察御史言姦臣紇石烈執

中事士論壯之後以母喪歸居許之西城有園圃號

小斜川花木泉石隱然一佳處公日在其閒行吟坐

嘯客至一觴一詠盡歡襟韻條然君子儒也尋判隰

州刺史召為戶部郎中同知河南府遷平陽路轉運

使卒金史卒于公泄官以廉俸祿未嘗妄糜布衣蔬

食泊如也性友愛弟毅才高相與甚歡所蓄稱其所

用獨好收古人器物所在購求以是叢于家古鏡尤

多其樣製不可徧識字畫勁古有顏平原風詩學黃

魯直格嘗贈余先子詩云邱垤孰與南山尊公卿皆

出山翁門山翁一作山公遺文人共師夫子陰德天教有是

孫問禮庭中新有桂忘憂堂下舊多萱人間樂事君

兼有歌我新詩侑壽樽此斜川時事也赴隰州被召

時又寄詩有句云溪口急流裁燕尾山腰世路轉羊

賜到郡涖官才九日過家上冢正重陽一云過家上冢正垂楊

陳司諫規字正叔絳州人金史稷山人明昌五年詞賦進士弱冠擢第

南渡為監察御史上宣宗十事一云上便宜十事按金史止八事直

言當時得失忤旨出為徐州帥府經歷官正大初收

用舊人召為右司諫數上書論事改刑部郎中金史云權

吏部郎中以事罷再為補闕復拜司諫言事不少衰朝望

甚重凡宮中舉事上曰恐陳規有言近臣竊議惟畏

陳正叔挺然一時直士也後出為中京副留守未赴

卒于圍城士論惜之公為人剛毅質實有古人風篤

學問至老不廢晚喜為詩與趙雷諸公唱酬其弔人

詩有云驄馬餘威行尚避仙鳧善政去猶思人以爲

破的初先人見其所上十事歎曰宰相材也惜乎朝

廷不能用後同朝相見甚歡未幾先人下世余復從

之游每論及時事輒憤惋蓋傷其言之不行也死之

日家無一金知友為葬之中州集云子良臣今在燕中

許司諫古字道真河間人父安仁子靜名士汾陽軍節

度使公少擢第金史明昌五年詞賦進士中州集承安中進士南渡為侍御

史時丞相术虎高琪擅權變亂祖宗法度公上章劾

之上知其忠常庇翼之凡有奏下尙書省輒去其姓

名然竟為高琪所中貶鳳翔幕正大初召為補闕遷

左司諫言事稍不及昔時後致仕居嵩山下病卒

集正大七年卒平生好為詩及書然不為士大夫所重

公論但稱其直云初貶鳳翔朝士畏高琪故皆不敢

與言余先子時為提舉南京榷貨事獨以詩送之有

云有晉必無楚兩雄難竝驅向來既發藥其可止半

途又曰君年迫桑榆隻身憂患餘雙親白楊拱同氣

紫荊枯貧無孟光春醉無驥子扶唯有忠義名可與

天壤俱蓋欲堅其初志也聞者竦然多傳之後由叔

麟之為鳳翔錄事先人又寄以詩云寄語多言唐諫

議生還記取李師中亦此意也

趙尙書思文字庭玉中山人中州集云字廷玉永平人明昌五年進士弟廷珪同

膺登科三子敬叔介叔方叔與其弟庭秀庭直皆名進士公少擢

第為省掾從完顏福興守燕都福興死奔詣南京行

宮擢侍御史出為汝州防禦使遷集慶軍節度

中州集云歷號州刺史汝州防禦使所在鎮靜吏民賴之公暇

以詩酒為樂好吹笛多著樂章為人傳誦南渡後士

大夫有典郡之榮者不及也正大末召為禮部尚書

卒為侍御史時與余先子同臺為禮部時余始一識

也為人寬厚有君子之風按遺山集有禮部尚書趙公神道碑

蕭尚書貢字真卿金史貞卿京兆人中州集云咸陽人唐太傅真十七代孫大定二

十二年進士少為名進士時號三蕭南渡為戶部尚書後

致仕還鄉卒金史云興定元年致仕元光二年卒諡文簡中州集云年六十六公博

學嘗注史記又著蕭氏公論數萬言評古人成敗得

失甚有理中州集云注史記百卷公論二十卷五聲姓譜五卷文集十卷行于世

史翰林公奕字宏父按中州集字季宏趙秉文滏水大集中史少中碑亦稱曰季宏

名人工書有能名自號歲寒堂主人正大初為翰林

修撰又充益政院官為上講書後致仕居亳卒重厚

人也中州集云大定二十八年進士再中博學宏詞程文典雅遂無繼之者年七十三卒

崔翰林禧字伯善衛州人與屏山同年進士也長于史

學歷代典故無不通南渡為翰林待制與閑閑屏山

同在院後出刺永州病卒

王翰林良臣字大用潞州人中州集云承安五年進士長于律詩尖

新工對屬南渡在館後從李天英北征遇害其上移

刺總管云筆底有神扶氣力人間無處著聲名又絕

句云流轉年光橋下水翻騰時態嶺頭雲溪翁道號
奇聳子除却松風百不聞人多傳誦之

石抹翰林世勣字晉卿

金史字景略

契丹人少有詞賦聲擢

第

金史承安五年詞賦經義兩科進士

讀書為文有體致南渡為左司

郎中坐事免久之為禮部侍郎

困學齋雜錄及中州集俱云終于禮部尙

書

司農太常卿翰林侍講學士從末帝東征至蔡州

城陷死有子嵩企隆

金史云嵩字企隆興定二年經義進士中州集云應奉翰林文

字父子皆死蔡州之難

王左司

字公玉臨潢人少擢第入仕以能稱大安

末為左司員外郎累遷青州防禦使與宰相抹撚盡
忠不協左遷刺州南渡以病免居蔡州卒雜學喜易
及佛老莊書

呂陳州子羽字唐卿大興人少為名進士擢第

中州集大定末

進士南渡為左司郎中坐事免官後同知開封府遷陳

州防禦使時軍旅數興戶口逃竄公因以實聞于朝
而小人李渙以為不憂國失軍儲下吏當死公恥之
縊于太康驛後朝廷知其無罪復其官公入仕以能
稱讀書為文有士大夫風致死非其罪天下傷之

李治中適字平甫欒城人少擢第中州集明昌二年進士有能聲

工詩善畫與屏山諸公游自號寄菴老人藹然名士

大夫也南渡授東平府治中後致仕居釣臺病卒有

子治中州集云子治字仁卿正大七年收世科屏山贈詩所謂仁卿不是人間物太白精神義山骨

也屏山嘗贈詩云寄菴丈人眼如月墨妙詩工兼畫

絕儒術吏事更精研只向宦途如許拙為監察御史

言紇石烈執中不法事聞者竦然按遺山集寄菴先生墓碑云子男三

人曰澈曰治曰滋

潘翰林希孟字仲明磁州人少擢第南渡為吏部主事

遷翰林修撰後病風疾卒為文條暢有法宣宗哀冊
玉冊皆其筆也

郭翰林伯英字伯誠上黨人第進士為南頓西平令有

治迹正大中由應奉遷修撰以風疾暴終為人質厚

不苟合喜讀書為文詞有香山賦諸公皆有詩

劉翰林祖謙字光甫解州人少擢第中州集安邑人承安五年進士為

吏有聲由寧陵令丁父憂數年不調南渡召為大理

司直拜監察御史出為河南府判官再召為翰林修

撰中州集云正大初為右司都事除武勝軍節度副使召為翰林修撰遭亂北遷為兵

士所殺

中州集云子敏仲今在平陽

公博學兼通佛老百家言從

趙閑閑李屏山諸公游甚為所重談論疊疊不窮援

筆為文奇士也嘗請屏山誌其父墓屏山以事廢命

余代焉銘辭屏山筆也迨屏山歿公以文祭有曰鳳

不足以言瑞龜不足以效靈吾視之其猶龍也諸公

稱之與余父子交嘗屬余作蒲萄酒賦題其父所畫

河山形勢詩亦一知己也

馮吏部延登字子駿吉州人

金史吉州吉鄉人承安二年登詞賦進士少擢

第南渡為太常博士累遷吏部郎中翰林待制奉使

北朝踰年歸遷吏部侍郎遭亂不知所終

金史云元兵圍汴京

倉猝逃難為騎兵所得欲擁而北行延登義不受辱遂躍城旁井中年五十八公為人謹厚

吏事亦精篤學問長年猶不輟在公署日鈔書為文

苦思尚奇澀詩亦新巧可稱與余先子交最善先子

入翰林公與趙閑閑所薦也平生著述甚多嘗以示

余亂後散失可惜

按元好問為作神道碑銘載遺山集第十九卷

時治中戡字天保後改字多福滄州人少為人奴後讀

書為學第進士其主良之南渡為監察御史歷清要

致仕卒為人純厚好學多讀易左氏春秋君子儒也

自號拙菴嘗屬余作記與余家三世交

王府判仲元字清卿東平人

中州集云平陰人承安中進士歷京兆轉運司幕官

以能書名天下子公茂

廣道先生之孫也工書法趙黃山自號

錦峯老人卒于京兆幕

張司直穀英字仲傑趙州人擢經義高第從屏山諸公游爲文以多爲勝嘗爲南頓令從軍數年入爲省掾大理司直卒自號无著道人屏山爲作夢記余先子同年進士也

歸潛志卷第四

歸潛志卷第五

王翰林彪字武叔大興人貞祐五年經義魁也爲文頗馳騁波瀾性疎放嗜酒不拘細事初對廷策宣宗喜其文以爲似古人特授太子副司經國史院編修官進司經末帝在東宮頗見知後入翰林爲應奉遷修撰出爲平涼府治中入爲待制出刺州未赴南京被圍食乏服絕粒藥俄飲酒被藥死嘗賦呂唐卿海藏齋詩云虛白雲中含法界軟紅塵底寄虛舟又只應烏帽紅塵底羞見蒼煙白鷺洲亦可喜也

張翰林邦直字子忠河內人少工詞賦嘗魁進士平陽南渡爲國史院編修官遷應奉翰林文字在館五六年從趙閑閑游性樸澹好學尤善談論人多愛之敬善謙甚士多愛之閑閑本注太元子忠嘗言親受于關中隱士薛子明因相與講辨甚久俄丁母艱出館居南京從學者甚衆束脩惟以市書惡衣糲食雖仕宦如貧士也同年如雷宋諸人皆以聲名意氣相豪子忠獨恬退以學自樂正大初余先子入翰林子忠從之游後先子下世有挽詩云桃李雙鳧鳥風霜一豸冠才

華驚世易勛業到頭難白日空金馬青天下玉棺傳家有賢子文或似歐韓甚爲諸公所稱先子歿與余善後南京被圍闕食余遇之富城西敝衣縵縷可憐已而聞鬻卜天街值一回鶻問卜子忠以文語應之爲回鶻所毆北渡將還鄉道病死哀哉

張翰林仲安字晉臣燕山人貞祐六年詞賦魁也爲人謙謹有禮法時輩稱焉爲文亦平暢得體尤工詞賦自居太學有聲入翰林爲應奉秩未滿卒士論皆惜之

高斯誠法颺大興人至寧九年經義魁也讀書有學問
與王從之李之純游爲詩文恬澹自得初調鳳翔府
錄事爲行部檄監支納陳州倉因忤都魁吏構之下
獄幾死已而赦免病終頗喜浮屠自號唯菴一作南菴與

余先子善

劉遇鼎臣真定人興定五年詞賦魁也少與王從之周
晦之游兼經義學有譽南渡爲國史院書寫已而擢
第應奉翰林後出爲鄜州帥府經歷官遇害嘗與余
同文會且同試于廷讀書有文學

張翔茂進太原人第進士爲南京權貨司勾當官遷南
京麴使出爲太康令涖官清苦有治聲好書從士大
夫講學爲文作詩有志于時名遭亂殍卒與余交最
善

董治中文甫字國華潞州人第進士中州集云承安中進士號無事道人

南渡嘗爲大理司直後爲河南府治中卒中州集云歷金昌府

判官禮部員外郎昌武軍節度副使正大中以公事至杞縣自知死期作書與家人及同官又作詩貽杞縣令佐詩畢擲筆于地以扇障面而逝自號無事老人爲人淳謹篤實

學道有得其學參取佛老二家不喜高遠奇異循常

道臨終預知死期齋浴而逝時人異之興定初余先子居喪淮陽公乘傳過焉談道竟夕余時為童子竊聽窗下蓋其于六經論孟諸書凡一章一句皆深思而有得必以力行為事不徒誦說而已既去先子大稱之後于郝丈國才處得所著一編皆論道之文迄今藏余家其子安仁傳其學亦謹厚人也

申編修萬全字百勝高平人與其兄無移百福中州集作無夷

百福俱擢第中州集云崇慶二年乙科百勝為人沈重不妄

交好經學勤勤君子儒也嘗為鄭縣令愛民慎獄不

為赫譽邑民便之後召入史館俄攝監察御史應奉

翰林居京師朝歸閉門講誦不出觀時事不愜意屢

欲以母老歸未果也正大末為南伐行臺辟掌書檄

至淮上大兩宵行溺水死士論惜之趙閑閑為文以

祭哀甚初百勝在太學與雷丈希顏及余先君同舍

相善先君嘗稱其為人後入朝先君已下世余因得

從游為文亦典雅有體

許國至忠懷州人少擢第有能名性閒澹不銳仕進居

盧氏西山下不赴調數年後召為南京豐衍庫使傾

家貨市書後告歸趙閑閑諸公多重之余嘗至其家
敝衣糲食環堵蕭然蓋清苦之士也未亂病卒

王貢安之北京人參知政事之翰從子也擢第以脩潔
稱南渡得度居鄆操行純謹時人甚重之後病卒

王彘子文洛州人少擢第中州集云承安中進士南渡為省掾睹

時政將亂一旦棄妻子徑入高山翦髮為頭陀自號
照了居士改名知非字無咎居達摩菴苦行自脩朝
廷初疑焉遣使廉之知其非矯偽乃止當世號王隱
居名甚高後十餘年忽下山歸其家復與妻子如舊

妻死更娶又為洛陽行省參議遭亂不知所終嗟乎
有始有卒者難矣哉

馬天來元章太原人擢第中州集云字雲章人止謂之元章介休人黃裳榜經義進

士與雷希顏宋飛卿同年為人詭怪好異又喜為驚
世駭俗之行人莫測焉南渡為史院編修官中州集云大安

初調潁州司候靈壁簿召為國史院編修官不事脩飾麻條草屨沈浮間

里殊無朝士風雜學通太元數又善繪畫及塑像雖
居官輒為人塑畫自神頗善李屏山當屏山歿為寫

真且題以贊皆怪語末曰若到黃泉見魯仲連蘭相

如道余傳示其狂誕如此後以病終中州集云正大九年病歿于京

師年六十一

楊戶部楨字正夫吉州人少擢第有能名南渡為左司員外郎頗與權要辨爭以罷後為戶部侍郎又行部河中北兵攻胡壁堡將陷正夫知不免先使其妻子赴黃河已從之死為人慷慨有氣節士大夫多稱之甚可惜

李中丞英字子賢遼東渤海人金史其先遼陽人徙益都中明昌五年進士第

布衣以氣節聞後擢第為省掾貞祐初北兵犯京師

與侯摯田琢請偕行提兵扼居庸關屢戰有功擢宣

差都提控南渡召為御史中丞詔與元帥庚壽按金史詔

元帥右監軍永錫左都監烏古論慶壽將兵此云元帥庚壽疑慶壽之誤同率兵援燕都

至潞州遇北兵戰死按金史是為貞祐三年三月十六日初子賢之出

也河南民望太平遽喪敗天下惋惜朝廷褒贈焉

田總管琢字器之蔚州人少擢第金史蔚州安定人明昌五年進士為

省掾貞祐初北兵圍燕器之慨然求見願出招鄉里

義兵守要衝宣宗壯之擢同知蔚州節度使得兵數

千屢與敵戰有功遷潞州防禦使宣差都提控南渡

駐軍陳州久之命守華州領節度使戰潼關下軍敗

歸罪于其副任鑄斬之改東平路轉運使俄命守益

都為山東東路兵馬都總管張林之變按張林事詳金史田琢傳

逐器之以城北降朝廷召之將加罪道發疽卒按金史卒

于壽張趙閑閑有送器之詩云田侯落落奇男子主辱

臣生不如死殿前畫地作山西願與義軍相表裏恨

我不得學李英愛君不減侯莘卿按趙詩自注云是時李英侯摯方出

戰有功橫道俘尸三十萬潼關大笑哥舒翰

梁翰林詢誼字仲經父絳州人戶部尚書襄子也少游

太學有聲為人多膂力尚氣節慨然有取功名志屏

山諸公皆壯之尤與雷希顏善文章豪放有作者風

既擢第復舉宏詞為應奉翰林文字出為上京留守

判官宣宗南渡宗室萬奴叛據上京獨仲經父不從

以節死朝廷優贈之

韓府判玉字溫甫燕人按金史相人中州集云其先相人後為漁陽人明昌五年經義

詞賦兩科進士少讀書尚氣節擢第入翰林為應奉文字後

為鳳翔府判官大安中北兵圍燕都夏人連陷邊州

陝西帥府檄溫甫為都統募軍得萬人出屯華亭與

夏人戰敗之而溫甫毅然有勤王志因移檄關中言
 詞忠壯聞者感動其檄有云人誰無死有臣子之當
 為事至于今忍君親之弗顧勿謂百年身後虛名一
 聽史臣只如今日目前何顏再居人世王侯將相寧
 有種乎富貴功名當自致耳或誣溫甫以有異志收
 鞫死獄中金史云道出華州被囚死于郡學與中州集同士大夫憤惜

聶左司天驥字元吉五臺人弱冠擢第金史至寧元年進士沈靜
 寡言不妄交入官以謹愿自守興定初為省掾時胥
 吏擅威士人往往附之獨元吉不少假借彼亦不能

害也後平涼帥辟為經歷官軍敗同其帥被責俄擢
 左司員外郎天興改元末帝東遷留二執政居守元
 吉與焉崔立之變二執政死元吉亦被創甚歸臥于
 家旬日不食卒金亡士流之在位以節死者惟元吉
 一人其死也其女子適以寡來歸家居見其父歿亦
 縊死孝女字舜英金史有傳時人傷之虞鄉麻革信之為作聶
 孝女傳按聶元吉聶孝女元好問俱為作墓志見遺山集

程御史震字威卿東勝人與其兄鼎和卿俱擢第公入
 仕有能聲興定初召百官舉縣令公得陳畱陳畱南

都屬邑頗繁公治為河南第一召拜監察御史彈劾

無所撓時皇子英王按金史作荆王即英王也為宰相家僮輩往

往恃勢侵民公以法劾之英王怒未幾坐為故吏所

訟罷官歲餘嘔血卒按遺山集御史程君墓表以正大元年三月二十一日春秋四

十有四終于京師私第公為人剛直有材幹忘身徇國不少私

與余先子同年擢第按墓表云明昌二年經童出身尋擢王剛勝詞賦進士乙科

相得甚歡已而同為御史臺綱大振小人皆側目故

俱不能久留于朝公既居閒慨然有志于學將延致

名儒執弟子禮師事之會卒士論惜之一云士論惜不盡其材

魏戶部琦字民英宏州順聖人少工詞賦擢高第為鄴

陽令有治行南渡為南京留守判官遷戶部員外郎

郎中以材幹稱貞祐末北兵犯潼關行部軍前至洛

陽見殺朝廷官其子焉

吾古孫左司奴申字道遠由女直人譯史入官性伉特

敢為有直氣嘗為監察御史時中丞完顏百家以酷

烈聞道遠以事糾罷朝士聳異後為左司郎中近侍

局使皆有名天興東狩留南京居守崔立之變同御

史大夫裴滿阿虎帶自縊于臺中與余先子善余嘗

皇清元卷五
爲賦古漆井詩

裴滿御史大夫阿虎帶字仲寧女直進士也經歷清要名亞完顏速蘭嘗爲陳州防禦使累遷御史大夫使北朝崔立之變自縊死同時戶部尙書完顏仲平亦自殺仲平亦女直進士也

末帝寶符李氏國亡從太后皇后北遷至宣德州居摩訶院李氏自入院止寢處佛殿中作爲旛旆數合會當同后妃赴龍庭將發于佛像前自縊死且自書門紙曰寶符御侍此處身故凡施旛旆幾何較之后妃

輩失節者何啻霄壤甲午歲余家武川觀其遺跡

李尙書元忠字獻可武州人

按金史別有李獻可字仲和雄州歸信人元忠無傳

少擢第歷清要南渡爲工部尙書審決河南冤獄多所平反俄坐督修京城工不謹出爲泰寧軍節度使致仕居陳州每朝廷有政事不合或民間利害屢上言亦讀書有學問和厚人也

李陳州山字夏卿一字安仁大名人少擢第歷清要南渡同知開封府遷陳州防禦使爲小人所陷罷閒居南京以事赴井死爲人重厚讀書喜作詩號松風老

人一作松
峯老人

劉戶部元規字元正子正云字咸平人少擢第南渡為侍

御史時木虎高琪為相擅權公數抗言事爭殿上出

同知武昌軍節度使事後為戶部郎中行部河中坐

事斥後致仕天興改元詔使北朝不知所終

康司農錫字伯祿趙州人中州集云寧晉人黃裳榜擢
第遺山集大司農丞康君墓

表云崇慶二年進士第與雷希顏冀京父同年進士正大初由

省掾拜監察御史上章言點檢完顏撒合輩預政非

宜又言宿帥紇石烈牙虎帶太恣橫不法時二人權

勢赫然伯祿皆不屑士論稱焉後為京南路司農少

卿再授河中帥府經歷官北兵陷河中帥率兵南奔

濟河船敗死墓表云城陷投
水死年四十八為人厚重有為頗讀書

嘗賦打毬詩云高飛遠走偶然耳坎止流行任所之

余先子云亦有理也

楊左司居仁字行之其先大興人後居南京年十八擢

第入仕以能稱為人謹密朝廷上下皆愛之為監察

御史言事稱旨由吏部郎中改太常少卿使北朝凡

再往歸坐事廢天興末遷為左司郎中與二執政居

守崔立之變被傷竄臥余家已而為立強起復舊職
俄以病辭去將北渡舉家投黃河死時年未五十公
少有吏能晚讀書作詩有佳處使任清時不失為名
卿材大夫遭世亂困躓可歎與余父子交最善余嘗
送其北使序及詩

房刑部維楨字周卿濟南人少擢第南渡為左司都事
司農少卿出刺申州召為刑部郎中卒為人謹愿讀
書作詩頗好賢

齊申州椿字壽之夏津人少擢第入官以廉稱南渡為
監察御史右司都事許古嘗上書薦之後為司農丞
進少卿出刺申州卒

張戶部俊民字用章延安人擢第以材幹稱嘗為戶部
郎中進侍郎遭亂北遷病卒為人慷慨尚氣義喜學
易

楊戶部慥字叔玉五臺人擢進士第中州集云承安五年進士南渡
為監察御史戶部郎中司農卿遷戶部侍郎通吏事
有能名正大末權參知政事後罷守戶部南京降病
卒嘗與余先子同任御史頗作詩

高尙書夔字唐卿保州永平人第進士涖官有才譽南
渡歷戶部員外郎後遷尙書專治糧儲嘗巡行京東
便宜行事抵罪詔釋之天興初為翰林學士亂後北

遷還鄉卒

一本此後
空白七行

馮內翰璧字叔獻

中州集云
別字天粹

真定人為嚴毅整肅望

之儼然人莫敢視然文采風流言談灑落使人愛之
不能捨以去詩筆清迺字畫嚴峻為一時所稱與李
屏山王從之同年第金史承安二年經義進士二公皆重之大安
初入翰林由應奉遷修撰後屢為法官臺察彈劾不

避權勢時高琪當國察其畏謹數以公推考貴人所
擬輒稱旨朝士多側目頗有刻骨之譏屢上章言事
又條上恢復之策出為同知亳州致仕歸嵩山結茅
玉峯下自號松菴徜徉泉石閒釀酒名松醪味勝京
師採蘭置室中與山僧野客作鬪蘭會壬辰之亂北
歸由東平至鎮陽以歿按遺山集內翰馮公神道碑
云以庚子七月十四日終于
家年七十有九平生文章工于四六尺牘為當代之
冠人得一篇皆寶藏之與韓溫甫高獻臣友善後進
中特喜雷希顏冀京父王仲澤皆從之游頗與余先

子善壬辰歲圍城中余居與公相近甚相往來時公年已高神采毅然目光如炬布袍麻屨杖策翩然後生輩莫及也北遷後再見于鎮陽今其亡矣前輩風流遂不復見惜哉子渭以孝稱

王革字德新宏州人

中州集云一名著臨潢人

少有才思詩筆尖新

風流人也屢舉不第以任子仕晚由恩得主宜君簿北渡居雲內後遷雲中卒年七十餘中州集云年七十八名士皆其友也尊酒之間一談一笑甚有前輩風今不復見矣戊辰冬赴試西京自以年高與諸後進偕入復

作此舉因有詩云慣挈蒼龍曉漏鐘受恩曾入大明宮香浮扇影迎初日人逐鞭聲靜曉風轉首俄驚成異世此身雖在已衰翁喚回五十年前夢再著麻衣待至公

郭子通為太常博士宋國遣信使以申議為名將有所求也宰相下其事于禮官諸公環視未對子通對曰申者重也再也自大定甲申講和之後盟約既定無復再議之事且以小事大若有祈請一作所請亦難申議之名宰相是之後宋使之來改曰祈請議者服其識

遠大定十七年三月朔萬春節諸國人使將見而大雨作大宗伯張公問子通曰禮當何如子通曰哀公問孔子曰諸侯朝于天子而不得見也有四雨沾服失容一也張公曰此非使臣之事子通曰彼國主之來尚不得見況其臣乎少頃有敕放朝士大夫服其知體右見李致美一作李致美作子通神道碑子通卒清州防禦使

歸潛志卷第五

歸潛志卷第六

高丞相汝礪字巖夫應州人少擢第金史金城人大定十九年進士

仕有能名嘗為左司郎中諫議大夫入戶部專掌財賦遷尚書改三司副使倡行鈔法以代貨泉宣宗南渡拜參知政事遷左右丞進平章政事右丞相封壽國公正大初薨于位年七十餘為人慎密廉潔能結人主知守格法循默避事不冒彊諫故為相十餘年未嘗有譴訶壽考康寧當世莫及金國以來書生當國者惟公一人耳

賈左丞守謙字彥亨

中州集云賈益謙字亨甫本名守謙避哀宗名改焉

東平人

少擢第

金史沃州人大定十年詞賦進士

莅官以能稱章宗時為諫

議大夫皇叔鎬王以疑忌下獄公力爭士論直之大

安末拜參知政事南渡進右丞遷左丞致仕薨

中州集云

正大三年年八十薨

胥平章鼎字和之代之繁時人父持國章宗時執政公

少擢第

中州集云大定二十八年進士

以能稱為右司郎中善占對

大安末為參知政事俄出鎮平陽宣宗南渡行臺河

中兵民安輯進平章政事兼左副元帥移鎮京兆封

莘國公後朝廷將伐宋取蜀召議公歸上言止之坐

是忤旨致仕薨

案金史宣宗興定元年詔鼎舉兵伐宋且令勿復有言以沮成算鼎已分

兵由秦鞏鳳翔三路竝進乃上五不可之議詔付尚書省宰臣以為諸軍既進無復可議遂寢是未嘗召

議也至二年四月鼎乞致仕溫詔不許三年以年老屢上表求致仕又遣人慰諭之俄以伐宋有功遷官

一階四年進封溫國公致仕詔論曰卿屢求退朕初不許者俟其安好復為朕用爾今從卿請仍可來居

京師或有大事得就諮決也哀宗正大二年起復拜平章政事進封英國公行尚書省于衛州鼎以衰病

辭不許三年復上書請老優詔復不許是年七月薨于位未嘗以上言忤旨致仕也又按封莘國公在興

定元年後疊有溫國英國之封此均未之及也公通達吏事有度量為政鎮

靜所在無賢不肖皆得其歡心南渡以來書生有方

面之柄者惟公一人而已

張左丞行信字信甫先名行忠避末帝舊諱改焉莒州人御史大夫暉之子太子太傅行簡之弟也家世以

純厚稱士論以為如漢萬石君家公少擢第金史登大定二

十八年進士第歷清要宣宗南渡為禮部尚書時丞相术虎

高琪擅權百官側目因廷議事公獨抗言折之上甚

喜明日拜參知政事未幾為近侍所譖出鎮涇州到

官上疏論近侍之姦士大夫稱重正大初首召拜左

丞言事稍不及前人望頗減後致仕數年薨金史云正大八

年二月乙丑薨于嵩山崇福宮年六十九為人簡樸

初遊嵩山嘗曰吾意欲主此山果終于此

不脩威儀惡衣糲食如貧士既致仕家居惟以鈔書

教子孫為事葺園池東城號靜隱亭時時游詠其閒

為樂金史云與侯摯輩游詠其閒南渡宰執中最有直名初至南

京父暉以御史大夫致仕猶康健兄行簡為翰林學

士承旨公為禮部尚書諸子姪多中第居官當世未

之有也

侯平章摯金史云初名師尹避諱改今名字莘卿東阿人少擢第金史明昌

請出募軍已而嬰城有功自行戶部侍郎遷河平軍

節度使

案金史云擢為右補闕未嘗言遷節度使

宣宗南渡為參知政事

案金史在貞祐三年八月

出鎮東平移鎮下邳所至吏民安愛後

入朝遷左丞

案金史云四年正月進拜尚書右丞

正大初進平章政事

封蕭國公

案金史在天興元年八月

居相位憤無所施請守大名

詔出行尚書省未幾還朝

案金史在天興元年十一月

致仕居南

京有園亭蔡水濱公日在閒與耆老讌飲後南京降

以前宰執為北兵所殺為人有威嚴御兵人莫敢犯

在朝遇事亦敢言頗喜薦士如張文舉雷希顏麻知

幾皆由公進用南渡後宰執中人望最重

李參政鞏字君美河中人少擢第有能名南渡為參知

政事出鎮平陽北兵至城陷自殺從子復亨字仲脩

踰冠擢第以才能稱為人通敏善奏對南渡為左司

郎中大為宣宗所器一時譽甚隆遷翰林直學士知

開封府進吏部尚書為參知政事年方四十父母俱

存近世未有也興定末坐監試進士失取人出鎮同

州未幾北兵攻城陷自殺叔姪相繼執政俱死事士

論所嘉愚軒趙宜之挽仲脩詩云報君惟有死見叔

固無慚人以為破的也

師參政安石字仲安

金史云本姓尹避國諱更焉

清州人少擢第輕

財尚氣義聞于朋友為省掾宣宗南渡從完顏福興守燕都福興將死以遺表託仲安使赴行在既達上嘉之擢樞密院經歷官時末帝在春宮領院事遂見知遇正大初進同僉樞密院事遷御史中丞工部尙書遂為參知政事其驟用如此既居位人望頗減俄以腦疽薨

李左丞蹊字貫之大興人少擢第通吏事能官南渡為

左司郎中遷吏部侍郎為蒲察合住所陷下獄當死詔釋之後為大司農正大初拜參知政事進左右丞專掌財賦北兵圍南京坐糧儲不給除名久之起為工部尙書權參知政事復左丞奉使軍前送曹王後從末帝東征至睢陽官奴之變見殺

吾古孫參政仲端字子正女直進士也為人謹厚涖官以寬靜稱興定間由禮部侍郎使北朝從入西域二年始歸為陳州防禦使遷御史中丞為參知政事人望甚隆天興東狩罷為翰林學士承旨知時事不可

支家居一室陳平生玩好日與夫人宴飲為歡癸巳正月下旬忽閉戶自縊其夫人亦從死明日崔立之變若先知者金國亡大臣中全節義者一人公使歸時備談西北所見屬趙閑閑記之趙以屬屏山屏山以屬余余為錄其事趙書以石迄今傳世閒也

完顏參政速蘭字伯陽

案金史作完顏素蘭一名至寧翼字伯揚速素疑音相通

元年女直進士魁也涖官脩謹得名然苛細不嚴任大事較之輩流頗可稱仕歷清要時望甚隆為宣宗所知擢任近侍局頗直言有補益旋罷出為諫議大

夫居父喪不飲酒食肉廬墓三年後為參知政事同紇石烈牙虎帶守京兆不相協召還至陝被圍久之亡奔行宮道遇害與余先子善弟奴申字正甫亦女直進士仕歷清要由吏部侍郎使北朝凡再往天興東狩拜參知政事畱守南京齷齪不能有為崔立之變見殺

完顏右丞胡斜虎字仲德

金史完顏仲德本名忽斜虎合懶路人

女直進

士也為人忠實有時望嘗帥秦鞏天興改元南京被圍仲德提孤軍入援轉戰數回止存五六人至京城

門遇末帝東狩因從以行駐睢陽拜參知政事從徙蔡州進右丞閒關險阻中盡心不懈蔡圍既急末帝內禪崩城陷仲德帥兵三百力戰不支赴蔡水死軍士皆從之其得士雖古之田橫無以加也金國亡死君者惟仲德

完顏平章合打由護衛入官典郡嘗陷北朝亡歸南都累擢平涼帥為人勇敢忠實一時人望甚隆拜參知政事代胥相鼎鎮京兆軍民便之北兵犯蘭關將兵拒戰有功入朝進平章政事封芮國公正大末北兵

由襄漢大入詔合打帥精兵拒之已而失利退保鈞

臺軍敗見殺

完顏中郎將陳和尚字良佐

金史名彝字良佐以小字行豐州人

兄斜烈

畢里海世襲猛安也忠義勇敢著名嘗陷北朝亡歸擢帥壽泗威望甚重性好士幕府延致文人改安平都尉嘗憤鬱無所施發病死良佐從其兄在軍中勇冠一時嘗坐擅殺人將抵死上奇其材特赦之為忠孝軍總領擢禦侮中郎將天興改元北兵入河南良佐從完顏合打力戰鈞臺軍敗被擒不屈死

案遺山集贈鎮

南軍節度使良佐碑云時年四十一良佐爲人愛重士大夫王渥仲澤在其兄幕府良佐從之游學仲澤書極可觀且同講經學讀書不輟亦一時弟兄良將帥也

移刺都尉買奴字溫甫契丹世襲猛安也讀史書慷慨有氣義喜交士大夫視女直同列諸人奴隸也嘗爲宣撫使便宜鄧豫閒以事杖殺經歷官坐廢後爲虎賁都尉提兵赴關中後由商南全軍而迴病死自號拙軒趙閑閑爲賦之諸公皆有詩正大初先子令葉余往省會溫甫屬余爲拙軒銘先子亦有詩

移刺樞密粘合字廷玉契丹世襲猛安也弟兄俱好文幕府延致名士初帥彭城雷希顏在幕楊叔能元裕之皆游其門一時士望甚重爲將鎮靜守邊不擾軍民便之天興東狩知國亡率鄧州軍民詣宋人納款宋以兵馬轄處之賜第居襄陽未幾病死

南渡之初將帥中最著名者曰郭仲元按金史作完顏仲元俗號

郭大相公其軍號花帽子原註花帽子一云蒼鶻子曰郭阿里俗

號郭三相公其軍號黃鶴袖二人本非親兄弟以其壯勇年齒先後爲配仲元爲將重厚沈毅有謀守鳳

翔北兵力攻數月不下而退卒保其城以聞後爲兵部尙書皇太后衛尉卒阿里最驍勇人莫能敵屢與北兵戰有功一時爲士庶屬目後提兵關中與宋人戰馬倒被擒不知存歿也

南渡後諸女直世襲猛安謀克往往好文學與士大夫游如完顏斜烈兄弟移刺廷玉溫甫總領夾谷德固术虎士烏林荅肅孺輩作詩多有可稱德固勇悍在軍中有聲嘗送舍弟以詩亦可喜天興初提兵戍譙軍亂見殺

南渡之後爲將帥者多出于世家皆膏粱乳臭子若完顏白撒止以能打毬稱又完顏訛可亦以能打毬號杖子元帥又完顏定奴號三脆羹有以忤忍號火燎元帥者又紇石烈牙忽帶一作牙虎帶號盧鼓椎好用鼓椎擊人也其人本出親軍頗勇悍鎮宿泗數年屢破宋兵有威好結小人心然跋扈不受朝廷制嘗入朝詣都堂詆毀宰執亦不敢言而人主倚其鎮東亦優容之也尤不喜文士僚屬有長裾者輒取刀截去又喜凌侮使者凡朝廷遣使者來必以酒食困之或辭

以不飲因併食不給使餓而去張用章嘗以司農少卿行戶部過宿見焉牙虎帶召飲張辭以有寒疾牙虎帶笑曰此易治耳趣命左右持艾炷來當筵令人拉張臥遽爇艾于腹張不能爭遂灸數十又因會宴諸將并妻皆在座時其食猪肉饅頭有一將妻言素不食猪肉牙虎帶趣左右易之須臾食訖問曰爾食何肉其人對曰蒙相公易以羊肉甚美牙虎帶笑曰不食猪肉而食人肉何也爾所食非羊人也其人大嘔疾病數日又御史大夫合住因事過宿牙虎帶館

之酒肉使妓歌于前及夜因使其妓侍寢遲明將發令妓徵錢合住愕然牙虎帶因強發其篋笥取繒帛悉以付妓曰豈有官使人而不與錢者乎合住無以對而去故司農御史皆不敢入其境避之又宿州有營妓數人皆其所喜者時時使一妓佩銀符屢往州郡取賕賂州將夫人皆遠迎號省差行首厚贈之其暴橫若此及康錫伯祿爲御史上章言其事且曰朝廷容之適所以害之欲保全其人宜加裁制然朝廷竟不能治其罪後北兵入境移鎮京兆軍敗召還道

病死在東方時盧鼓椎之名滿民間兒啼亦可怖大
概如呼麻胡云

任履真子山許州長葛人讀書喜雜學深于醫又有鄉
行邑人皆信之貞祐初召入太醫院旋告歸與閑閑
屏山諸公及余先子善先子主長葛簿其脩儒宮及
太虛觀子山之力居多爲醫起人疾甚衆旣卒閑閑
誌其墓云

案壙銘見滏水
集第十一卷

張子和睢州考城人初名從正精于醫貫穿難素之學
歷歷在口其法宗劉守真完素藥多用寒涼然起疾
救死多取效士大夫稱焉爲人放誕無威儀頗讀書
作詩嗜酒以居陳游余先子門後召入太醫院旋告
去隱然名重東州麻知幾九疇與之善使子和論說
其術因爲文之有六門三法之目將行于世會子和
知幾相繼死迄今其書存焉

僧德普武川人自號勝靜老人倣儻有機術與士大夫
游飲酒食肉豁如也嘗爲木虎高琪所重在軍中論
兵南渡居陳之開元寺與余先子善嘗著彌陀偈談
理性先子爲序之屏山亦喜其俊爽不羈也頗喜字

畫作詩年六十餘死余謂古之文暢祕演之流

僧圓基

一作圓真

字子初姓田氏亦北人雖爲浮屠喜與豪

士游負其材略有握兵治民之志蓋隱于僧者也嘗
住持南京靜安寺以不檢去之峴山歷嵩陽死與德
普相善頗能詩嘗題移刺右丞畫云調燮之餘總是
閒閒中遊戲到毫端而今亦有丹青手猶在蟠溪把
釣竿可見其有志也又詠柳葉云一氣潛通造化中
人間無處不春風莫嫌冷地開青眼試看天桃幾日
紅

王赤腿不知其名字年齒人以其衣短號哨腿王或云

名予可字南雲河東人幼嘗爲卒不詳居鄆蔡閒以

乞食爲事衣皮衣露膝長歎好插花額上繫一銅片

如月人問之皆有說又時時自言爲天帝所召

一云又時

時自言踪跡或稱爲天帝所召

有某仙某神在焉所食何物皆誕詭

莫可測然善歌詩有求之者索韻立成字亦怪異在
鄆城凡寺觀樓閣及民家屋壁書其詩殆遍往往有
奇麗語如天仙有夢梅云鼎鑄陶鈞政格新橫斜疎
影慰騷魂嬰香枕篔簹黃昏月懋棣東風笑谷春又經

閒漱几虛雲鎖杯捲江山枕島樓

原本注島一作鳥

卻憶西

巖舊宮殿半橫星斗下瀛洲又題石潭云石裂雲華

浸月秋

中州集浸作漬

又松陰滾碎闌干角其他多僻怪不

可曉問之則曰出天上何書書名亦不可曉或云為

鬼物所憑麻知幾獨重之李子遷贈詩云骯髒風儀

古丈夫鶴袍鐵面戟髭鬚人間春色向頭剩天上月

明當額孤石鼎夜聯詩句健

中州集作詩筆健

布囊春醉酒

錢麤危樓說倚街頭看

一作月


應見潛飛入玉壺狀其

人殆盡正大初奈過鄆諸公為召至索詩求韻立書

辭亦不可曉後因病失一目明遭亂北渡病死

歸潛志卷第六

48-12297



皇朝三才圖會